
ЭНГ КАТТА БОЙЛИК - БИЛИМ ВА ҲУНАР

Бугунги кун Ёзёвон тумани ёшлари учун унутилмас, қизиқарли лаҳзалар, амалий мулоқотларга бойлиги билан эсда қолади.

Вилоят ҳокими Шухрат Ғаниев мактаб ва коллеж битирувчилари билан самимий суҳбатлашди. 31-умумтаълим мактабида “Ёшлар-келажак бунёдкори” шиори остида ўтган учрашувда келажакимиз эгалари бўлган ёшларнинг ҳаёт тарзи, қизиқишлари, орзу-умидлари, интеллектуал салоҳиятларини амалга ошириш билан боғлиқ масалаларга алоҳида эътибор қаратилди, уларни қизиқтираётган савол ва муаммоларга ечимлар топилди.

Моҳинур Марупова 13- умумтаълим мактаби битирувчиси. Мактабда яхши ўқиши, намунали хулқи билан тенгдошларига ўрнак бўлиб келади. Бўш вақтларида Қўштепа туманидаги чим устида хоккей спорт тўғараги машғулотларига қатнаб, салмоқли ютуқларни қўлга киритди. Мамлакат терма жамоаси аъзолигига қабул қилинди, спорт устаси бўлди. Мулоқот жараёнида у тумандаги 14 -умумтаълим мактабида чим устида хоккей спорти учун майдон ва спорт анжомлари бериш таклифи билан чиқди.

- Биз, - деди Моҳинур, ўқувчи қизлардан жамоа тузамиз ва мусобақаларга пухта тайёрланиб, ғолиблик учун курашамиз.

Ёш спортчининг ташаббусини вилоят ҳокими қўллаб-қувватлашга тайёр эканлигини билдирди.

Марғилон шаҳрида очилган Рақамли технологиялар маркази ва бу ерда яратиб берилган қулайлик, имкониятлар кўплаб ёшларнинг соҳага қизиқишини оширди. Буни мулоқотда сўзга чиққан ёшлар эътироф этиб, ўз ҳудудларида унинг филиалини ташкил этиш таклифини билдирдилар.

- Ёзёвон туманида мазкур Марказнинг дастлабки филиалини очиб берамиз, - деди вилоят ҳокими.

- Трикотаж йўналишида тадбиркорлик фаолиятини йўлга қўйганман, - дейди Ёзёвон транспорт коллежи битирувчиси Худойберди Қодиров. - Мақсадим фаолият кўламини янада кенгайтириб, 30 та янги иш ўринлари яратиш эди. Учрашувда таклифим ҳоким томонидан қўллаб-қувватланиб, ишлаб чиқариш ускуналари, хом-ашё олиш учун имтиёзли кредит бериш масаласи мутасаддилар иштирокида ҳал этиб берилди.

Ёзёвон транспорт коллежи битирувчиси Озодбек Анваров олий таълим муассасаларида ҳунармандчилик йўналишини очиш масаласида ўзини қизиқтирган саволларга жавоб олди. 13-умумтаълим мактаби битирувчиси, ёш тадбиркор Ҳафизахон Мамадалиева тикувчилик цехи фаолиятини йўлга қўйиш учун гаровсиз кредит олиш масаласида билдирган таклифига ҳам ижобий ечим топилди.

Мулоқот жараёнида олий таълим йўналишларига ҳужжатлар топшириш, тест имтиҳонларини ўтказиш билан боғлиқ кўплаб саволларга вилоятдаги олий таълим муассасалари раҳбарлари жавоб бердилар. Бир гуруҳ ташаббускор ёшларнинг янги боғ, тут плантациялари ташкил этиш борасидаги лойиҳалари ҳам маъқулланди.

Фарғона вилояти ҳокимлиги Ахборот хизмати Facebook, Telegram, Веб сайт, YouTube

2020-06-18 20:48:21